

E Matakehoo, Ihugovaa ae Piipiiana

Vivian Tatana

Teo peho vuri na teitei roho a peha si otei ae a bua roosuu. A si otei a piipiiana, a peha roosuu he a matakehoo, a meha he a ihugovaa.

E Piipiiana a taom sisibu rakaha, me tea maa nubunubu vai to gunagunaha maa nae tea sisibu, toro varoroava vaha roho toon na peha vasu tobina ruene, eove repaa voosu maana. A si otei bona he ahiki bea vahara beiko pate tei mi bari, ei kou na igoigosi bata ni rori bona maa pii vaa suinnae, me ahiki beori sisibu mi bari, eove vaavaha komana toro sisibu papahiana batana.


O si matapaku vai na tapaku tamuana, me teo peho bon mepaa gunaha bana maa, mepaa sisibu me sisibu, evehe vasisibu vakavara bana, mepaa toka hiava bana tea vasu, mepaa vavaaroroava. Vavaaroroava bata nao, mepaa goroho umee teebona.

Teo bon bona me, mea bua roosuu vai ere Ihugovaa bo Matakehoo paa vavaahipi gunaha bana bata maa bona ruene, meori hae gunaha maa bona ruene. Meori paa pahin kao ahe koa maa bona si otei, evehee goroho vataraa ki nana bona roava toon na vasu.

Tara vai nao e Ihugovaa, mepaa sue ki bene Matakehoo, “Maagee! A peha si aba to goroho maanau! Subunubu eara paa ma ira vaha bana, beve goroho vaha bana nana, eara repaa ma ato e, are paa ma vadee voosu nie.”

E Piipiiana he kou a goroho umee, meve sa haraa haana ta peha si taba. A bua roosuu voosu vaha vai, a si otei vai me tagune vai, mepaa voosu vaaruu.

Teo peho bon tea nubunubu mea si otei e Piipiiana paa tara bana koa a vahara beiko he nao bana ruene, mepaa vamurina. Suguna vai, mepaa taneo bana tea vasisibu me sisibu, vasisibu vakavara, mepaa toka hiava bana tea vasu, mepaa taneo bana tea varoroava, me varoroava, me varoroava, mepaa goroho umee bana koa toon na vasu.



Meori paa vadee voosu ni bari teo naono.

Goroho nana, a bua roosuu he hae gunaha bana maa bona ruene, meori ma suguna bana en to varoroava nae Piipiiana. Eori he suguna me Ihugovaa paa tara nao bona, mepaa sue ki bene meha teve, “Maagee! A tabaan tearau to goroho bana maanau! Eara kahi ivihi vasisio koa nau, eara paa ripoto e, eara paa kis a bua moonae ae a bua kurinae.”

Merau, a si otei peana goroho nana, a bua roosuu he ivihi koa nao, meori paa ripoto bari, meori kisi bona maa kurinae ae a bua moonae. Dee takin vai ori, meori paa hogo ni bono naono, meori paa vadee voosu ni bari teo naono. E Ihugovaa teo momohu, e Matakehoo he dee kaakoo bata naona teo vamurina, ei kou a kehoo.

Mea bua otei paa dee, meori dee, a si otei he tea vakokona bata, “Havee toro paku vo naa, enaa re rosin kahi ria bua roosu vai ei?”

Vahuusu bata naori bona vaan, e Piippiiana he taneo tea koto kurukurusu bona kisikisi vaa kurinae. E Matakehoo he sa nata bata haana kou bona tabae to paku batana, ei kou sa tara bata haana.

Eori he vahuusu rakaha bata naori bona vaan tea bua roosuu, a kiikisi vaa kurinae tarigaha vakavara. Mepaa atoato bata koa ni nao bono naono. Mepaa vaahohi vo tea kisi vaa moonae. Meo peho kurina ato vakisi nana. O meho he rigaha vagegeana bona kisi vaa moonae, mepaa tara ahe koa bono peho naono, mepaa iku hiava, a bua otei he pita oha kokoraa. Eori he haraa bona vadee he aea, me Ihugovaa paa sue, “Rerau pahi! Eara vahuusu vai a vaan, mepaa aea u a vadee!”

A si otei gunaha kahi koa bono pea naono, mepaa rosin, mepaa no peha varavihi teo peho naono.

A bua roosuu voosu pahi, meori vaobete batari bono vadee teori, e Ihugovaa he tara vahiki bona otei, mepaa sue, “Maagee! A tabaan teara paa rosinu rehe! Nomaa vahaa, are rakerake vahaa nao e!”

Mea bua roosuu paa vatabin vahaa, meori paa rake vaha nao. Nao vasihum koa, me Ihugovaa paa pahin taga ahe koa bona teo naono ei teo kopuru rakaha. Me Ihugovaa paa sue ki bene Matakehoo, “Maagee! A tabaan teara oi teo naono.”

Meori paa taneo tea dadao gunaha bari, “Eh! Ean toro gunaha koa maa! Gunaha koa maa!” Ahiki he be Piippiiana baitono ri bari, me Ihugovaa paa sue ki bene Matakehoo, “Usu nom, benaa vaakuu gunaha mae, ean repaa pou vamate e!”

Me Ihugovaa paa peha, me peha, a si otei me toku vai toro paku voe, me Ihugovaa vahuusu bata naona bona, eove he beaka maa bono hum to peha kaakoo bata nao nae, meo naono paa dohidohi, me sa paa antee haa tea peha hiava."

E Matakehoo he kou paa usu vakikis vaevuru putaa, ihuana koana be Piippiiana kuu gunaha maa.



E Piipiiana paa pou vamate bene Ihugovaa.

E Ihugovaa he paa kehi vaha bana, me vahuusu bana bata naona bona si otei, eove he beaka gunaha maa bona matane Ihugovaa, me pahin doriri gunagunaha, me ma busu vabirihi en rapane Matakehoo, me Matakehoo paa pou bona bene ta naono, me pou, e meha teve he nagu batana tea sue, “E Maagee! Enaa ve e Ihugovaa!” Evehee ahiki, e meha teve he paa navuhu vamate pahiu bona.

Me Matakehoo peana sun veavea nana, e Piipiiana he doriri gunaha koa maa mepaa pou vaaruu bona, me pou, me pou, mepaa pou vamate bona.

Mepaa kuhoo teo kara tete.